

Nek Bano

Injeel : Kulussiyon 3:1-17

Tumko bhī Īsā^(a.s) ke saath naī zīndagī atā kī gaī hai, to tum bhī jannat kī cheezon kī kḥwaahish karte rahā karo. Usī jagah par Īsā^(a.s) Allaah ke paas maujud haiñ.⁽¹⁾ Un cheezon se apnā dil lagao jo jannat me haiñ nā ki is duniyā kī cheezon se.⁽²⁾ Tumhaarā puraana wajuḍ jo gunaahgaar thā wo mar gayā hai, aur tumheñ naī zīndagī Īsā^(a.s) se milī, jinke paas Allaah taa'alā kī qudrat hai.⁽³⁾ Īsā^(a.s) hamaarī zīndagī haiñ, aur wo jab dobaarā āeñge, tum bhī unki azmat me hisseदार hoge.⁽⁴⁾

Islie socho ki tumhaarā jism is duniyā kī shaitaanī kḥwaahishon ke liye mar chukā hai. To tum log shaitaanī kḥwaahishaat se, badkaarī se, zinā se dur haṭo, gañde kaam aur burī kḥwaahishaat rakhnā ḥoḍ do. Hameshā zyaadā kī kḥwaahish mat karo aur laalach ḥoḍ do, kyuñki ye buton ke pujne jaisā kaam hai.⁽⁵⁾ Inheen bure kaamon kī wajah se Allaah taa'alā kā azaab un par naazil hotā hai, jo kahnā naheen maante.⁽⁶⁾ Pahale tum log bhī isī tarah se zīndagī guzaarte the aur bure kaam anjaam dete the.⁽⁷⁾ Lekin, ab tum ko in sab cheezon ko apnī zīndagī se baahar nikaalo: Gussā, jhujhalaahaṭ, dusron ko nuqsāan pahuñchaanā, yā unke raaz kholnā. Jab tum baat karo to gañde alfaazon kā istemaal karnā ḥoḍ do.⁽⁸⁾ Ek dusre se jhuṭ mat bolo kyuñki ab tum apne puraane wajuḍ ko nikaal kar pheñk chuke ho jo tumhaare bure kaamon kī wajah se barbaad ho chukā thā.⁽⁹⁾ Aur apne nae wajuḍ ko amal me laao, jo tumne Allaah taa'alā kī haqeeqat ko samajh kar haasil kiyā hai. Is tarah tum uske jaise ho jaaoge.⁽¹⁰⁾ Is naī zīndagī me Yahudī aur ġair-Yahudī logon me koī farq naheen hai. Un logon me bhī koī fark naheen hai jinhone kḥatnā karaayī yā naheen karaayī, yā wo log jo dusrī jagaahon se āe haiñ. Ġulaam aur āzaad logon me koī fark naheen, kyuñki sabse zarurī baat ye hai ki Īsā^(a.s) har ek ke liye haiñ.⁽¹¹⁾

Allaah taa'alā ne tumheñ chunā hai, taaki tum uskī nek qaum kahalao, kyuñki wo tumse mohabbat kartā hai. Islie hameshā dusron par raham karo, meharbaanī karo, narmī se pesh āo, shareef bano, aur sabr karo.⁽¹²⁾ Ek dusre par ġussā nā karo, balki ek dusre ko maaf kar do. Jo bhī kisī dusre kī shikaayat kartā hai to use maaf kar denā chaahie. Tum dusron ko usī tarah se maaf kar do ki jaise Allaah taa'alā tumheñ kartā hai.⁽¹³⁾ Ye sab karo, lekin ek cheez bahut zarurī hai; aur wo hai ek dusre se pyaar. Pyaar hī wo cheez hai jo tumko ek dusre se joḍ kar rakhtā hai.⁽¹⁴⁾ Tum apne dilon me al-Maseeh Īsā kī mohabbat rakho. Haqeeqat me, Allaah taa'alā ne tum ko ek banā kar bhejā hai, to tum uskā shukriyā adā karte rahā karo.⁽¹⁵⁾

Īsā^(a.s) kī taaleem kā asar tum par hameshā rahnā chaahie. Tum aqlmañdī se dusron kī ġaltiyon ko sudhaaro aur ek dusre ko Zabur shareef kī taaleem sikhaao. Tum Allaah rabbul kareem kā dil se shukriyā adā karo aur uskī hamd-o-sanā karo.⁽¹⁶⁾ Tum jo bhī karo yā bolo, usmeñ Īsā^(a.s) kī taaleem nazar āñi chaahie aur uske zarie Allaah taa'alā kā shukr adā karo.⁽¹⁷⁾